

13. oktober 2006

UKA 2006/29

**Akileraruserinermik ingerlatsineq pillugu Inatsisartut inatsisissaattut
siunnersuut**

pillugu

Inatsisartut Akileraruserinermut Akitsuusiisarnermullu Ataatsimiititaliaata

ISUMALIUTISIISSUTAA

siunnersuutip aappassaaneerpeqarnerani saqqummiunneqartoq

Inatsisartut Akileraruserinermut Akitsuusiisarnermullu Ataatsimiititaliaat
suliarinninnermini ukuninnga inuttaqarpoq:

Inatsisartunut ilaasortaq Augusta Salling, Atassut (siulittaasoq)
Inatsisartunut ilaasortaq Agnethe Davidsen, Siumut (siulittaasup tullia)
Inatsisartunut ilaasortaq Lars Emil Johansen, Siumut
Inatsisartunut ilaasortaq Agathe Fontain, Inuit Ataqtigiiit
Inatsisartunut ilaasortaq Lene Knüppel, Demokraatit (sinniisussaq)
Inatsisartunut ilaasortaq Tommy Marq, Siumut (sinniisussaq)
Inatsisartunut ilaasortaq Jens Lars Fleischer, Siumut (sinniisussaq)

Inatsisartut Akileraruserinermut Akitsuusiisarnermullu Ataatsimiititaliaata UPA
2006-imi siunnersuutip siullermeerpeqarnera tunngavigalugu inatsisissatut
siunnersuut nassuiaatit ilanngullugit kiisalu tusarniaanermut akissutitut tiguneqartut
misissuataarsimavai. Siullermee-rinninnermi apeqqutit saqqummiussat
annertunerusumik paasinarsarneqarnissaat siunertaralugu Aningaasaqarnermut
Nunanullu Allanut Naalakkersuisoq ulloq 2. oktober 2006 Aki-leraartarnermut
Akitsuusiisarnermullu Ataatsimiititaliamut allagaqarpoq. Allagaq
isumaliutissiissummut matumunnga **Ilanngussaq 1-itut** ilanngunneqarpoq.

Naalakkersuisunut ilaasortap allagaani takuneqarsinnaavoq akileraruserinermut
ingerlatsiviginerata qitiusumit aqunneqalernera 20 mio. kr. missaannik
annertussusilinnik Namminersornerullutik Oqartussanit kommunit ukiumut
taartisiaqartinneqartassasut ilimagineqartoq. Ernianit akiliutitigullu isertitanit
annaasanit 11 mio. kr. missaannit kiisalu akileraruserinermut ilassutinit isertitanit
annaasanit 9 mio. kr. missaannit aningaasartai katitigaapput.

Akileraarutinit A-nit annaasat, akileraarutinit tapiliussat ilaasalu nunatta karsiata kommunillu akornanni nangittumik agguanneqarnissaasa isumaqatigiissutigineqarnerannik kommuninut ataatsimoortumik tapiissutit pillugit isumaqatigiinniarnit inernejarsimasut Naalakkersuisut ilanngullugu nalunaaruteqarput. Namminersornerullutik Oqartussanut kommuninullu ukiumut annaasat katillugit maannakkut 22 mio. kr.-iupput. Taamaammat inatsisissat siunnersuutip aappassaaneernejarnissaanut agguataarinissamik isumaqatigiissutip sunniutaasa ilanngunneqarnerinik ilallugu Naalakkersuisut allannguutissat siunnersuummik saqqummiussiniarput.

Siunnersuutittaaq siullermeerneqarnerani aalajangiissamaarneq pillugu allakkat Skatterådilu pillugit apeqqutit saqqummiunneqartut pillugit itisilerissutaasumik paasisutissanik aammattaaq Naalakkersuisunut ilaasortap allagaa imaqqarpoq.

Skatterådip allaffeqarfikkoortumik sullinneqarnera pillugu Aningaasaqarnermut Nunanullu Allanut Naalakkersuisumut ulloq 10. oktober 2006 allagaqarluni Inatsisartut Akileraartar-nermut Akitsuusiisarnermullu Ataatsimiititaliaat tapiliussanik apeqquteqarpoq. Ataatsimiititaliap apeqqutai Naalakkersuisullu akissutaa 11. oktober 2006-imeersoq isumaliutissiissummut matumunnga **Ilanngussaq 2-tut 3-tullu** ilanngunneqarput.

Inatsisissat siunnersuutip tusarniaassutigineqarnera.

Inatsisissat siunnersuut pillugu tusarniaanermut allagaq naapertorlugu Akileraartarnermi Pisortaqqarfiup tusarniaanera piffissami ulloq 19. juni 2006-imiit ulloq 20. juli 2006-imut ingerlanneqarpoq. Tusarniaanermutaaq ilanngunneqarput UKA 2006/30 aamma UKA 2006/32 innersuullugit akileraartarneq pillugu inatsisit allat marluk. Tusarniaavigineqartut aamma tusarniaanerup inerneranun tunngasut pillugit inatsisissat siunnersuummut nalinginnaasumik nassuiaatit innersuussutigineqassapput.

Tusarniaanermi atortussat annertussusiat imartussusiallu, kiisalu piffissap tusarniaaviusup aasakkut sulinnigiffeqarnerup ingerlaleruttorneranut piffissalernejarsimanera eqqarsaatigalugit piffissaq tusarniaanermut akissuteqarfissaq sivikippallaatut aalajangernejarsimasoq Aki-leraartarnermut Akitsuusiisarnermullu Ataatsimiititaliaq isumaqqarpoq. Tusarniaanernut piffissaliinernik naammaginarnerusunik naalakkersuisoqqarfik siunissami aalajangersaasariaqqartassasoq ataatsimiititaliaq inassuteqarpoq.. Akileraartarnermut Akitsuusiisarnermullu Ataatsimiititaliap isummiussaasa itisilernejarneri pillugit UKA 2006/30-mi inatsisissat siunnersuummut ataatsimiititaliap isumaliutissiissutaa innersuussutigineqassaaq.

Akileraartarnermut Akitsuusiisarnermullu Ataatsimiititaliap isumaliutersuutai.

Inatsisartunit isummernerit

Akileraarutini akiliisitsiniartarnerup sunniuteqarnerusumik ingerlalnissaa siunertaralugu akileraartarnerup ingerlatsiviginerata aaqqissuuteqqinneqarnissaa qitiusumillu aqunneqalernissaa Inatsisartut 2. maj 2005-imi aalajangigaa inatsisissatut siunnersuut malitsigaa. Inatsisissatut siunnersuutip siullermeerneqarnerani partiit tamarmik inatsisissatut siunnersuutip a-nguniagai isumaqatigaat.

Siunnersuutip tamanut tunngasunik imarisai

Isertitanit akileraarutit akitsuutillu il.il. namminersornerullutik oqartussani ataatsimoortumik ingerlatsivimmi Nuummi qullersaqarfilimmik allaffilittut aaqqissuussami kiisalu Qaqortumi, Nuummi, Sisimiuni Ilulissanilu nunap immikkoortuini sisamanik allaffilittut ataatsimut aqutsivigineqassat Naalackersuisut siunnersuutigaat. Nunap immikkoortukkaartumik aaqqiinikkut innuttat 50%-iinit inuussutissarsiutinillu ingerlatsisut 75%-iinit amerlanerit toqqaannartumik attavigineqartarnissaat, nunallu sinnerani kommunini saaffiginnittarfitsigut, nunaqarfinni allaffitsigut aammalu tele atorlugu nutaaliaasumik attaveqaatitigut kiffartuussineq qulakkeerneaq.

Innuttanullu aqutsinikkut oqilisaanerit aalajangersimasut, soorlu digitaliusumik imminut kiffartuunneq innuttallu ilaannut akileraarutit pillugit nammineeerluni nalunaarsuisarnerup atorunnaarsinneqarnera Naalackersuisut aammattaq aallartisarnerpaat. Tamatumunnga soqutiginneqaluni Akileraartarnermut Akitsuusiisarnermullu Ataatsimiititaliaq ineriartornermik malittarinninniarpog, inatsisissatullu siunnersuutip siullermeerneqarnerani aqutsinikkut oqilisaatissatut aalajangersimasumik siunnersuutit sapinngisamik annertunerpaamik ilanngunneqarnissaat ingammik Naalackersuisunut kaammattuutigissallugit. Innunut aalajangersimasumik isertitalinnut, soorlu pensionisialinnut, kiisalu akitsuutit aalajangersimasut pisariillisakkamik akilersinniarneqartarnerinut tunngatillugu isertitat pisariillisakkamik nalunaarsorneqartarnissaat ilaavoq.

Siullermik imarisat allannguutaasa ilaanni akileraarutitut akitsuutinullu tunngasuni assigiin-ngitsuni ingerlatsinikkut nakkutilliinikkullu periusissanik assigiiaarnerusunik inatsisissatut siunnersuut pilersitsissammat Akileraartarnermut Akitsuusiisarnermullu Ataatsimiititaliap maluginiarpaa. Ilaatigut erniat ilassutillu angissusiisigut akilersinniarneqarnerisigullu naleqqusaasoqassaaq, tamannalu innuttanut annertunerusumik siumut naatsorsuutiginnitsitsilissaaq.

Aalajangiissamaarneq pillugu allakkat

Inatsisissatut siunnersuutip siullermeerneqarnerani Demokraatit apeqqutigaat Inatsisissatut siunnersuummi § 12, imm. 2-mi aalajangiissamaarneq pillugu allakkat kingunerissaneraat kingullermik akileraaruseriineq pillugu akileraartarnermut ingerlatsiviup aalajangiineri pillugit innuttat amigartumik ilisimatinneqartassanersut. Manna tikillugu peruserineqarsimasoq assigalugu ilanngaatigineqartussatut kissaatigineqartup itigartinneqarneratigut isertitanik angissusiliineq allanngortinniarneqarpat akileraaruseriviup innuttaasumut nalunaaruteqartarnissaa anguniarneqarpoq. Taamatut nalunaaruteqarnermut innuttaasoq qisuariangippat

aalajangiissamaarneq pillugu allakkamut naapertuuttumik inaarutaasumik naatsorsuinermi isertitanik angissusiliineq allanngortinneqassaaq.

Naalackersuisunut ilaasortaq 2. oktober 2006 allakkamigut taamatut aaqqiinissamut tunngaviusoq itisileriffigaa kiisalu aalajangiissamaarneq pillugu allakkamut assersuut ilanngullugu nassiullugu. Aalajangiissamaarneq pillugu allakkat akileraaruasiinermik aalajangiinerup immikkoortuinut aalajangersimasunut tunngatillugu tusarniaanermut allakkatut taamaattussatut, kingusinnerusukkut inaarutaasumik naatsorsuinermi innutaasumut inaarutaasumik nalunaarutigineqartussatut isigineqartariaqarput. Akileraartarnermut ingerlatsiviup angissusiliinertut ingerlataa, innuttaasoq uparuaateqanngippat, ingerlatsivimmit aalajangikkatut pissuseqanngitsoq, aammalu ilaannakuusumik aalajangiinertut iluseqanngitsutut aalajangiinertulluunniit kingusinnerusukkut atortussanngortinneqartussatut Akileraartarnermut Akitsuusiisarnermullu Ataatsimiititaliap tamatuma kingorna tunngavissaatippaa. Naalackersuisunut ilaasortap oqaatigisaa naapertorlugu kingusinnerusukkut aalajangiinermik, tassalu inaarutaasumik naatsorsuinermik, innuttaasup naammagittaalliutigisinnaagaa inernerup taassuma uppernarsarppaa, aamma aalajangiissamaarneq pillugu llakkami pissutsit pineqartut ilanngullugit eqqarsaatigalugit. Aalajangiissamaarneq pillugu allakkamut innuttaasoq qisuariaateqanngippat inatsisitigut persaqusersorneqassanngitsoq ataatsimiititaliap paasivaa.

§ 12, imm. 2 naapertorlugu aalajangiissamaarneq pillugu allagaqartarnermik maannamut periuserineqartoq pillugu tunngavissarititat taaneqartut atorlugit Akileraartarnermut Akitsuusiisarnermullu ataatsimiititaliaq upaaruaatissaqanngilaq. Aalajangiissamaarnerli pillugu allakkami inaarutaasumik naatsorsuineq pillugu kingusinnerusukkut naammagittaalliummik tunniussisinnaaneranut *sunniuteqartussaanngitsoq* akileraartarnermut ingerlatsiviup innuttaasumut paasinarsartariaqaraa ataatsimiititaliap kissaatigaa. Taamatut erseqqissaanikkut innuttaasut uparuaasinnaanermut piffissaliussaq pituttuisuusumik naammagittaalliornissamut piffissaliinerusutut kukkusumik paasineqarnissaa pinngitsoortinneqassaaq, tak. maannakkut oqaasertaliinertut atorneqartartoq: "*Ulloq killissarititaasoq nallertinnagu akerliliissuteqarsimanngikkuit, naatsorsuutigissavat angissusiliineq saqqummiunneqartoq suliarineqareersutut.*"

Skatterådip sulinera allaffeqarfiullu kiffartuussinera

Akileraaruseriviup sulinera naammagittaalliummik suliaqarneq iluarsineqartarpoq aallunneqartarlunilu. Inatsisissatut siunnersuutip siullermeerneqarnerani Skatterådip allaffeqarfikkootumik kiffartuussinera immikkut soqutigineqarpoq. Inatsisissatut siunnersuutip § 5, imm. 7-iani tamanna ima aalajangersagartaqarpoq: *Skatterådip allattoqarfeqarnissaa Naalackersuisut isumagissavaat. Allattoqarfik sulinermini Naalackersuisunut attuumassuteqanngilaq.* Allaffeqarfiulli sulisui inuttut aaqqissuussaannikkulluunniit Naalackersuisunut attuumassuteqartuunnginnerannik tigussaasumik iliuuseqarnikkut qulakkeerinninnissaq inatsimmut ilaatinneqan-ngilaq.

Siullermik Skatterådimit immikkut allaffeqarfimmik pilersitsinermi aningaasaqarnikkut pitsaanngequtissat Aningaasaqarnermut Nunanullu Allanut

Naalackersuisup 2. oktober aamma 11. oktober 2006-imi allakkatigut akissummini pingaartillugit oqaatigaa. Skatterådip namminerisaminik allaffeqarfeqarneranut aningaasartuuteqarnerussutit ukiumut 1,5 mio. kr.-iussasut kiisalu allaffeqarfiup pilersinneqarnerani ataasiartamik aningaasartuutit 0,5 mio. kr.-iussasut Naalackersuisunit missingerneqarput. Aappaatut namminersornerullutik Oqartussat oqartussaaffiisa marluk akornanni akileraartarnermi sulisorisanik suliamut paasisimasaqarluartunik amerlagisassaannigitsunik pissarsiniunnikkut unammilleqatigiinnissaat pitsaanngequteqassasoq Naalackersuisunut ilaasortap uparuarpa. Allaffeqarfiutaaq suliat pitsaassusissaasigut qaffasissumik pitsaassuseqarnissap, sulisullu suliassanik naammattumik amerlassusilinnik suliassaqarnissaasa akornanni equngasoqarsinnaaneramik Naalackersuisut aarleqquteqarput.

Tunngavilersuutit taakku Akileraartarnermut Akitsuusiisarnermullu Ataatsimiititaliap tusaatissatut tiguai. Allaffeqarfiulli attuumassuteqannginnera tunngaviusumik isigalugu taamaallaat soqutiginaateqarnerarlugu Naalackersuisut isumaqarnerat ataatsimiititaliap isumaqatigisinnaanngilaa. Skatterådip kiffartuussinerani atorfilinnik, naammagittaalliutitut suliassami illua tungiliuttumit, tassalu namminersornerullutik oqartussat akileraartarnermut ingerlatsiviani, atorfeqartinneqartumik akissarsiaqartinneqartumillu isumalluuteqartariaqarmat tamanna piviusumik tigussaasumillu ajornartorsiutaasoq Akileraartarnermut Akitsuusiisarnermullu Ataatsimiititaliaq isumaqarpoq. Taamatut aaqqiineq Skatterådip innuttanit isigineqarneranut tutsuiginassusianullu qularutissaanngitsumik *naleqqutinngilaaq.*

Naammagittaalliummut aalajangiisutut inunnit taakkunannga naammagittaalliortarfiup aalajangigassai piareersarneqartassammata suliami peqataasinnaanermut ingerlatsinermut inatsimmi maleruagassat akornusiisuussammata ataatsimiititaliap maluginiarpaa. Tamatumali allaffeqarfimmi sulisorisani suliffimmut tunniusimalluarnikkut annertuumik aporfissaqartoqalernissaa pinaveersimatinnaviannigilaa. Inatsisissatut siunnersuummi aaqqiinertut toqqakkakkut allaffeqarfimmi sulisut ulluinnarni qullersariminnit pappiaqqakkut ilitsersorneqarnissakkullu attuumassuteqannginissaat qulakkeerneqassaaq. Tamatumali pisortamik suleqatimillu isumaannik ilisimasaminnik pisussaasutut pissusissamisoortumik innimisunnissaannik misigisimajunnaarsinnaviannilai. Taamaammat assersuutigalugu Isumaginninnermi Naammagittaalliuteqartarfimmut, Atuisartut Siunnersuisoqatigiivinut aamma Kalaallit Nunaanni Unammilleqatigiinnermut Ataatsimiititaliamut iluatsissimanertulli allaffeqarfiup sulisoqarnikkut aaqqissuussaannikkullu attuumassuteqartuunnginneranik inatsisitigut isumannaatsuutitsisoqarsinnaasoq ulluinnarnilu tunngavilersuisoqarsinnaasoq oqaatigineqarsinnaavoq.

Skatterådi namminerisaminik allaffeqarfimmit sullinneqassappat akileraartartutut innuttat inatsisitigut illersugaanerat *ilumut ajorseriartinneqassasoq* tassunga tunngatillugu Aningaasaqarnermut Nunanullu Allanut Naalackersuisoq ulloq 11. oktober 2006 allagaqarluni oqaaseqarpoq. Taamatut oqaaseqarneq ataatsimiititaliap eqqumiigisorujussuuaa naatsorsuutigiumanagulu toqqartariaqarlugu. Suliamut naammagittaalliutaasumut akuusunut allaffeqarfimmit attuumassuteqanngitsumit

piginnaalluartumit siulersorneqarneq inatsisitigut illersugaanermut pitsaaqutaassasoq qularutissaassagunangilaq.

Skatterådip allaffeqarfianik attuumassuteqanngitsumik pilersitsinissamut isumaqataanermut akerliunermullu tunngavilersuutit oqallisigereerlugit Akileraartarnermut Akitsuusiisarnermullu Ataatsimiititaliaq isummernermini assigiinngitsunik isumaqarpoq:

Skatterådip aamma siunissami allaffeqarfeqarnikkut sullinneqarnera akileraartarnermut ingerlatsivimmit isumagineqarnissaanik Akileraartarnermut Akitsuusiisarnermullu Ataatsimiititaliami amerlanerussutillit, tassaasut Siumumit, Inuit Ataqtigiinnit Atassumillu sinniisorisat Naalakkersuisut siunnersuutaannut isumaqataasinnaapput. Qitiusumik aqutsinerup sapinngisamik annertunerpaamik killilersimaarneqarnissaa, akileraartarnermullu ingerlatsiviup qitiusumut inissinneqarneratigut aqutsinerup annikillisarneqarnissaa siunertarerpiarlugulu paasisimasaqarluartut sapinngisamik annertunerpaamik ataatsimoortinneqarnissaat amerlanerussutillit tassunga atatillugu pingaartippaat. Skatterådimit aalajangiineq innuttaasumit tutsuiginartutut isigineqanngippat pineqartoq Inatsisartut Ombudsmandiannut eqqartuussivinnulluunniit eqqartuussivikkoortumik aalajangiinerup misilinneqarnissaa pillugu pisariaqarpat saaffiginnissinnaavoq.

Akileraartarnermut Akitsuusiisarnermullu Ataatsimiititaliami ikinnerussutilik, Demokraatit sinniisorisaat isumaqarpoq inatsisitigut illersugaanissaq pissutigalugu Skatterådip allaffeqarfiata attuumassuteqartuunnginnissaa erseqqissumik pisariaqartoq. Taamaalilluni Skatterådi inatsisinik atuinermi, taamatullu naliliinermik ingerlatsinermini akileraartarnermut ingerlatsiviup soqutigisaanut attuumassuteqartuunngitsoq innuttanit tutsuigineqarsinnaavoq. Taamaammat ikinnerussutillip inatsisissatut siunnersuummut allannguutissatut siunnersuut ilanngunneqartoq saqqummiuppa.

Skatterådip ilaasorta qarneranut tunngasoq

20. juli 2006 tusarniaanermut akissummini Kanukokap oqaatigaa Skatterådimit ilaasortanut tamanut, siulittaasoq kisiat pinnagu, pissusissamisoortumik piumasaaqataasariaqartoq akileraarutinut maleruagassanik paasisimasaqarnissaq. Siunnersuutip siullermeerneqarnerani Demokraatit isuma taamaattoq isumaqatigaat. Isuma taanna inatsisissatut siunnersuummut nalinginnaasumik nassuiaatini naalakkersuisunulluunniit ilaasortap siunnersuutip siullermeerneqarnerata kingorna oqaatigalugit allallugillu oqaatigisaasigut oqaaseqarfigineqanngilaq.

Tunngaviusumik isigalugu akileraarutinut ataatsimiititaliami ilaasortat akileraartarnermi maleruagassanik paasisimasaqartariaqarnerannik isummamut Akileraartarnermut Ataatsimiititaliami ilaasortat isumaqataapput. Ataatsimiititaliami ilaasortanut naammagittaalliutit suliasani pituttuisuusumik aalajangiisartunut, inatsiseqarnikkut pisariusinnaasunut innuttaasumullu annertuumik kinguneqaateqarsinnaasunut tamanna naatsorsuutigissallugu pissusissamisuussaaq.

Piomasagaat taama ittoq inatsimmut ilaatinneqartariaqarnersoq tamatuma kingorna apeqqutaalerpoq. Taamaassimassappat ilaasortat paasisimasaqarnerat kiisalu ilaasortanik paasisimasaqarnikkut amigaatilinnik toqqaasoqarsinnaanera kia alaatsinaattussaanaeraa inatsimmi isummerfigineqartariaqassaaq. Allat tamaasa allangortinnagit Naalakkersuisut ilaasortanik aalajangersimasumik qaffasissusilimmik piginnaasalinnik eqqutitsisinnaasutut nalilernerqartunik Naalakkersuisut toqqaanissamut taamaallaat pisussaasaqariaqarput. Taamatulli periuseqartoqassappat inuit kikkut ataatsimoortumik naliliivigereerlugit suliassamut piukkunnarnerpaanersut pillugit kattuffiit maannakkut nammineerlutik naliliisinnaanerata annertuumik annikillisinneqarnera kingunerissagaa Akileraartarnermut Akitsuusiisarnermullu Ataatsimiititaliaq isumaqarpoq.

Tamanna tunngavigalugu maannakkut inatsisissatut siunnersuutip aaqqiissutissarititaa, tassaasoq; siulittaasup akileraartarnermi maleruagassanik paasisimasaqarnera kiisalu allatigut isigineqarnera Naalakkersuisut kisiisa akisussaaffigissagaa, § 3, imm. 2. Naalakkersuisut § 3, imm. 3, oqaaseqatigiit aappaat (kattuffiup inassuteqarsimannginnera pissutigalugu) inassuteqaatitaqanngitsumik ilaasortamik allamik toqqaappata pineqartup akileraartarnermi inatsisinik paasisimasaqarnera isigineqarneralu Naalakkersuisut aamma ilanngullugu eqqarsaatigissagaa ataatsimiititaliap naatsorsuutigaa. Taamaattoqarpat ataatsimiititaliap siulittaasuanut piginnaasanut piomasagaatigineqartut qaffasitsiginissaat piomasarissallugu pisariaqassanngilaq. Pisuni allani pineqartup piukkunassusianik kattuffiit inassuteqartussatut naliliisinnaanerata pingaartinneqassasoq ataatsimiititaliaq isumaqarpoq.

Taamatullu Skatterådimit ilaasortat tamarmik, ilaatigut akileraartarnermut akitsuusiisarnermullu tunngasuni inatsisinut naleqquttunut pikkorissaanerit atorlugit, suliassaannik suliassa qarfiinillu nassuiaannissaannut pisariaqartutut sulisunik atugassiinisaq naalakkersuisoqarfiup isumagissagaa Akileraartarnermut Akitsuusiisarnermullu Ataatsimiititaliap naatsorsuutigaa.

Skatterådip kalaallisut taaguuserneqarnissanut tunngasoq

Siunnersuutip siullermeerneqarnerani periarfissaq manna iluatsillugu, manna tikillugu "Skatterådi"-mik taaguummumut taarsiullugu Skatterådip kalaallisut taaguuserneqarnissaanik Atassutip siunnersuutaa Akileraartarnermut Akitsuusiisarnermullu ataatsimiititaliap iluaraa. Apeqquummumut isummaminnik tassungalu ilanngullugu taaguutitut siunnersuutigineqartoq *Akileraartarnermut Siunnersuisoqarfik* pillugu Naalakkersuisut saqqummiissasut ataatsimiititaliap kaammattorpai.

Akileraarusiisarnermut Akitsuusiisarnermullu Ataatsimiititaliap ataatsimoortumik naliliinera.

Siunnersuutip siullermeerneqarnerani Inatsisartut isumaqatigiittut assigalugit Akileraartarnermut Akitsuusiisarnermullu Ataatsimiititaliap nuannaarutigaa akileraartarnermut akitsuusiisarnermullu inatsisit ingerlatsivigineqarnerat pillugu

aalajangersakkat pingaarnerit katersorneqarlutillu assigiissaarneqarmata. Inatsit akileraartarnikkut qitiusumik sunniuteqarnerusumillu aqutsinissamut taamaalilluni ammaassivoq. Qitiusumit aqutsineq allaffissornerup annikinnerulernerinnaanik akileraarutinillu akiliisitsiniartarnerup sunniuteqarnerulerneranik taamaallaat inerneqassanngitsoq, nunatsinnili akileraartartutut innuttat assigiiaarnerusumik inussiarnernerusumillu pissuseqarfigineqalernissaannut annertunerpaamik aamma tunngavissiissasoq Akileraartarnermut Akitsuusiisarnermullu Ataatsimiititaliap naatsorsuutigaa.

Inatsisitigulli isumannaatsuutitsinissaq pissutigalugu Skatterådip allaffeqarfikkut attuumassuteqanngitsumit sullinneqarnissaa pisariaqartoq ataatsimiititaliami ikinnerussuteqartoq isumaqarpoq.

Aappassaaneerinninnissamut allannguutitut siunnersuuteqalersaarnermik Naalakkersuisut nalunaaruteqarnerat pillugu ataatsimiititaliap oqaatigissavaa isumaliutissiissutip matuma akuersissutigineqarnissaatut piffissaliussap iluani tamanna sulii saqqummiunneqarsimangimmat.

Akileraartarnermut Akitsuusiisarnermullu Ataatsimiititaliap inassuteqaataa.

Annaasassat ilaasa agguanneqarnissaat pillugu Naalakkersuisut Kanukokamut aningaasaqarnikkut isumaqatigiissutaasa pilersitaanik inatsisissatut siunnersuutip allannguutai ilanngullugit saqqummiunneqartoq aappassaaneerinermi siuliani oqaaseqaatigineqartut ilanngullugit akuerissutigineqassasoq Akileraartarnermut Akitsuusiisarnermullu Ataatsimiititaliami amerlanerussutillit tassaasut Siumumit, Inuit Ataqtigiinnit Atassumillu sinniisorisat inassutigaat.

Inatsisissatut siunnersuut annaasassat ilaasa agguanneqarnissaat pillugu Naalakkersuisut Kanukokamut aningaasaqarnikkut isumaqatigiissutaasa malitsigisaanik allannguutissatut siunnersuut kiisalu allannguutit ilanngunneqartut malitsigisaanik inatsisissatut siunnersuutip allannguutai ilanngullugit saqqummiunneqartoq Akileraartarnermut Akitsuusiisarnermullu Ataatsimiititaliami ikinnerussutillip Demokraatinerup Inatsisartunit akuersissutigineqassa-soq inassutigaa.

Taama oqaaseqarluni Inatsisartut Akileraartarnermut Akitsuusiisarnermullu Ataatsimiititaliaata siunnersuut Inatsisartunut aappassaaniigassanngortippaa.

Augusta Salling
Formand

Lars Emil Johansen

Agathe Fontain

Agnethe Davidsen

Lene Knüppel

[Ilanngussaq 1](#)

[Ilanngussaq 2](#)

[Ilanngussaq 3](#)